



SLUŽBENE NOVINE GRADA ZENICA

GODINA XLVIII
Broj 7

Utorak, 26.05.2022. godine

ISSN 1840-4588

GRADSKO VIJEĆE

106.

Na osnovu odredbe člana 14. stav (4) i člana 16. Zakona o eksproprijaciji Federacije BiH („Službene novine Federacije BiH“, broj: 70/07, 36/10, 25/12)) i odredaba člana 21. Statuta Grada Zenica („Službene novine Grada Zenica“, broj: 5/15), Gradsko vijeće Zenica, na svojoj 23. sjednici održanoj dana 26.05.2022. godine, donijelo je sljedeću

ODLUKU

O UTVRĐIVANJU JAVNOG INTERESA

1. Utvrđuje se da je od javnog interesa za smještaj gradskih službi za upravu i drugih organa Grada Zenica eksproprijacija / preuzimanje zemljišta sa objektima poblježe označenog u Elaboratu eksproprijacije broj: 422/22 od januara 2022. godine, sa Stručnim mišljenjem o nužnosti procesa rekonstrukcije zgrade hotel „Rudar“ za privođenje konačnoj namjeni objekta za smještaj administracije organa Grada Zenica, koji čini sastavni dio ove odluke, a kojim je predviđena eksproprijacija / preuzimanje sljedećih nekretnina:

- **k.č. broj: 1059/3 KO Zenica I**, zvana „Rudarski hotel“, po načinu korištenja dvorište, površine 3.678 m², u ZK ul. broj: 7239 i PL broj 296, upisana kao vlasništvo i posjed sa 1/1 dijela u korist JP „Elektroprivreda BiH“ d.d. Sarajevo ZD RMU „Zenica“ d.o.o. Zenica;

- **k.č. broj: 1056 KO Zenica I**, zvana „Rudarski hotel“, po načinu korištenja hotel, kafana, površine 864m², u ZK ul. broj: 1505 i PL broj 296 upisana kao vlasništvo i posjed sa 1/1 dijela u korist JP „Elektroprivreda BiH“ d.d. Sarajevo ZD RMU „Zenica“ d.o.o. Zenica;

- **k.č. broj: 1059/1 KO Zenica I**, zvana „Rudarski hotel“, po načinu korištenja kuća, zgrada i dvorište,

ukupne površine 6.879 m², u ZK ul. broj: 7239 i PL broj: 296 upisana kao vlasništvo i posjed sa 1/1 dijela u korist JP „Elektroprivreda BiH“ d.d. ZD RMU „Zenica“ d.o.o. Zenica;

- **k.č. broj: 1059/2 KO Zenica I**, zvana „Dom rudara“, po načinu korištenja kuća i zgrada, površine 525 m², u ZK ul. broj: 1504 i PL broj 296 upisana kao vlasništvo i posjed sa 1/1 dijela u korist JP „Elektroprivreda BiH“ d.d. Sarajevo ZD RMU „Zenica“ d.o.o. Zenica i

- **k.č. broj: 1059/4 KO Zenica I**, zvana „Rudarski hotel“, po načinu korištenja kuća, zgrada i dvorište, površine 708 m², u ZK ul. broj: 7239 i PL broj 296 upisana kao vlasništvo i posjed sa 1/1 dijela u korist JP „Elektroprivreda BiH“ d.d. Sarajevo ZD RMU „Zenica“ d.o.o. Zenica.

2. Sastavni dio ove odluke je Izvještaj o procjeni tržišne vrijednosti nekretnine – poslovni objekt - hotel „Rudar“ Zenica broj: 004.220.102.010 od 23.01.2022. godine, sačinjen od strane stalnog sudskog vještaka građevinske struke Nijaza Mačka.

3. Određuje se da je korisnik eksproprijacije Grad Zenica, kojeg zastupa Gradsko pravobranilaštvo Zenica.

4. Na osnovu ove odluke Služba za imovinsko-pravne, geodetske poslove i katastar nekretnina Grada Zenica može pristupiti provođenju postupka eksproprijacije zemljišta označenog u elaboratu eksproprijacije, koji čini njen sastavni dio.

5. Ova odluka je konačna u upravnom postupku, ali se tužbom protiv iste može pokrenuti upravni spor kod Kantonalnog suda u Zenici u roku od 30 dana od dana njenog dostavljanja. Tužba se podnosi neposredno navedenom sudu.

6. Ova odluka ima se objaviti u „Službenim novinama Grada Zenica“.

O b r a z l o ž e n j e

Gradsko pravobranilaštvo Zenica je svojim aktom broj: U-39/21 od 17.01.2021. godine, dostavilo prijedlog za pokretanje procedure proglašenja javnog interesa za smještaj gradskih službi za upravu i drugih organa Grada Zenica.

Predlagač je uz prijedlog dostavio Elaborat ekspanzije broj: 442/22 od januara mjeseca 2022. godine, sa Stručnim mišljenjem o nužnosti procesa rekonstrukcije zgrade hotel "Rudar" za privođenje konačnoj namjeni objekta za smještaj administracije organa Grada Zenica, sačinjene od strane JP za prostorno planiranje i uređenje grada "Zenica" d.o.o. Zenica po narudžbi Grada Zenica.

Uvidom u dostavljeni prijedlog, proizlazi da su Grad Zenica i ZD RMU „Zenica“ d.o.o. Zenica dana 12.01.2022. godine potpisali Protokol o načinu rješavanja međusobnih odnosa između ZD RMU „Zenica“ d.o.o. Zenica i Grada Zenica broj: 02-45-540/22, kojim se, između ostalog, utvrđuje potreba preuzimanja hotela „Rudar“ sa okolnim zemljištem u korist Grada Zenica, a prema procjeni vrijednosti predmetnih nekretnina, koja će biti sačinjena od strane ovlaštenog sudskog procjenitelja, a sve prema naprijed navedenom elaboratu sa stručnim mišljenjem, dostavljenim u prilogu istog zahtjeva.

U prilogu zahtjeva dostavljen je i navedeni Protokol. Uvidom u odredbe Protokola pravno relevantne za ovaj postupak, utvrđeno je da su potpisnice Protokola saglasne oko niže navedenih činjenica:

- da se pribavi procjena tržišne vrijednosti hotela „Rudar“ od ovlaštenog sudskog procjenitelja, koja će biti bazirana na ranije izvršenoj procjeni tržišne vrijednosti objekta sa okolnim zemljištem, na osnovu koje je već bila zakazana javna prodaja od strane Kantonalne porezne uprave (KPU) Zenica, najkasnije do 17.01.2022. godine,
- da se pripremi prijedlog odluke o proglašenju javnog interesa za ekspanziju/preuzimanje hotela „Rudar“ sa okolnim zemljištem, objekta starog „Doma rudara“ sa okolnim zemljištem i ostatka zemljišta uz hotel na kojem postoji individualni stambeni objekat, s tim što preuzimanje hotela „Rudar“ treba biti obavljeno

odmah nakon potpisivanja Sporazuma o preuzimanju između ZD RMU „Zenica“ d.o.o. Zenica i Grada Zenica, dok će preuzimanje ostalih nekretnina biti obavljeno u skladu sa potrebama Grada Zenica i u dogovoru sa ZD RMU „Zenica“ d.o.o. Zenica,

- da su potpisnice Protokola saglasno izjavile da u postupku proglašenja javnog interesa za ekspanziju/preuzimanje hotela „Rudar“ neće osporavati procjenu ovlaštenog sudskog vještaka niti će donesene odluke o ekspanziji / preuzimanju pobijati kod nadležnih organa i
- da će ZD RMU „Zenica“ d.o.o. Zenica u proceduri preuzimanja hotela „Rudar“ obezbijediti saglasnost hipotekarnog povjerioca (Porezne uprave FBiH), kojim će biti definisan način uplate sredstava iz osnova naknade za preuzimanje nekretnine.

Uvidom u Stručno mišljenje o nužnosti procesa rekonstrukcije zgrade hotel "Rudar" za privođenje konačnoj namjeni objekta za smještaj administracije organa Grada Zenica, koji čini sastavni dio ove odluke, Gradsko vijeće Zenica je Odlukom o utvrđivanju javnog interesa broj: 04-45-1208/22, donesenoj na 18. redovnoj sjednici održanoj dana 24.01.2022. godine, prihvatilo prijedlog Gradskog pravobranilaštva Zenica da se proglašenjem javnog interesa za ekspanziju/preuzimanje predmetnih nekretnina, zatim rekonstrukcijom postojećih prostorija hotela "Rudar" i promjenom namjene iz hotelskog smještaja u kancelarijske prostorije, konačno steknu uslovi za smještaj administracije organa Grada Zenica na jednom mjestu. Činjenica koja je Grad Zenica opredijelila da kroz ovaj postupak osigura grupisanje njegovih organa na jednom mjestu ogleda se u tome da su isti organi smješteni u više zgrada, što usporava njihov rad, a koja je otežavajuća okolnost u smislu organizacijskog problema realizacijom ovog projekta u konačnici trebala biti prevaziđena.

Protiv navedene odluke Gradskog vijeća Zenica ZD RMU „Zenica“ d.o.o. Zenica, zastupan po v.d. direktoru Edinu Mujičiću, dana 25.02.2022. godine, blagovremeno je pokrenulo upravni spor tužbom pred Kantonalnim sudom u Zenici, iz razloga što tuženi organ u postupku donošenja odluke istom nije dostavio njen prijedlog i time mu omogućio učešće u postupku, temeljem čega je predložio naslovljenom sudu da njegovu tužbu uvaži, pobijanu odluku poništi

i predmet vrati tuženom organu na ponovni postupak. S druge strane, tuženi organ zastupan po Gradskom pravobranilaštvu Zenica, u svojem odgovoru na tužbu ostao je u cijelosti kod svih činjeničnih i pravnih razloga za donošenje osporene odluke, s prijedlogom sudu da podnesenu tužbu u cijelosti odbije kao neosnovanu.

Nakon sprovedenog postupka u nejavnom rješavanju, odlučujući po predmetnoj tužbi, Kantonalni sud u Zenici donio je Presudu broj: 04 0 U 013578 22 U od 16.05.2022. godine, kojom je istu tužbu uvažio, osporenu Odluku Gradskog vijeća Zenica broj: 01-45-1208/22 od 24.01.2022. godine poništio i predmet vratio tuženom organu na ponovni postupak. Uvidom u obrazloženje presude proizlazi da je odluka tuženog organa zasnovana na povredama odredaba člana 7., 8., 133., 141. i 207. Zakona o upravnom postupku, a koje se povrede ogledaju u neomogućavanju tužitelju da učestvuje u ispitnom postupku, da s tim u vezi daje potrebne podatke, braneći svoja zakonska prava i zakonom zaštićene interese, uz istovremeno iznošenje činjenica koje mogu uticati na rješenje stvari.

Pridržavajući se uputa datih u obrazloženju ove presude, u ponovljenom postupku Služba za imovinsko-pravne, geodetske poslove i katastar nekretnina je prethodno dostavila tužitelju Elaborat eksproprijacije broj: 442/22 sačinjen od strane JP za prostorno planiranje i uređenje grada „Zenica“ d.o.o. Zenica od januara 2022. godine, a Gradsko vijeće Zenica istom omogućilo učešće u postupku, na način što je tužitelju uputilo poziv za prisustvo sjednici na kojoj se razmatrao prijedlog ove odluke, kako bi se za govornicom Vijeća izjašnjavao o svim činjenicama koje mogu uticati na rješenje stvari, zastupajući svoja zakonska prava i interese, sve u skladu s odredbama Zakona o upravnom postupku i njegovim načelima, a što se dokazuje uvidom u izvod iz stenograma sa sjednice Vijeća na kojoj je donesena ova odluka. Na navedenoj sjednici Vijeća, Edin Mujičić u svojstvu zakonskog zastupnika ZD RMU „Zenica“ d.o.o. Zenica izjasnio se da se ne protivi smještanju Gradske uprave Zenica na lokalitet hotela „Rudar“, pod uslovom otpisa dugovanja nastalih po osnovu kamate za osnovni dug za korištenje građevinskog zemljišta. Također je zamolio da se objekat Doma rudara izuzme iz predmeta eksproprijacije, cijeneći da je isti kulturni objekat od historijskog značaja za Rudnik Zenica, uz isticanje mišljenja da bi se taj problem mogao riješiti klauzulom u ugovoru, temeljem koje bi se Gradu

Zenica dalo pravo preče kupnje predmetnog objekta, ukoliko bi došlo do prodaje predmetnog objekta, odnosno nestanka Rudnika ili već nekih nepredviđenih okolnosti.

Povodom ovakvog izjašnjenja zakonskog zastupnika ZD RMU „Zenica“ d.o.o. Zenica, vijećnica Emina Tufekčić predložila je Vijeću usvajanje zaključka, kojim bi se prijedlog ove odluke vratio njenom predlagачu na doradu i to na način da se prethodno zaključi sporazum o otpisu dugovanja na strani Rudnika po osnovu kamata za glavni dug za korištenje građevinskog zemljišta, te iz prijedloga odluke izuzme objekat Doma rudara. Nakon provedenog glasanja vijećnika, prije odlučivanja o konkretnom prijedlogu odluke, utvrđeno je da predloženi zaključak nije dobio poslovnički neophodnu većinu, jer su se za isti zaključak vijećnici izjasnili sa 4 glasa „ZA“, 4 glasa „PROTIV“ i 13 glasova „UZDRŽAN“. S obzirom da je diskusija zaključena, jer nadalje nije bilo prijavljenih za raspravu, pristupilo se glasanju o prijedlogu ove odluke te je isti prijedlog usvojen, nakon što je 18 vijećnika glasalo „ZA“, 3 vijećnika glasalo „PROTIV“ i 1 vijećnik glasao „UZDRŽAN“.

Tako je, nakon provedenog ponovnog postupka po presudi Kantonalnog suda u Zenici, donosilac ove odluke utvrdio identično činjenično stanje izneseno u uvodnom dijelu ovog obrazloženja, a temeljem kojeg je donio svoju raniju Odluku broj: 04-45-1208/22 od 24.01.2022. godine. Naime, izneseni zahtjev zakonskog zastupnika ZD RMU „Zenica“ d.o.o. Zenica vezan za otpis sporednih potraživanja Grada Zenica prema ovom privrednom subjektu nije i ne može biti od uticaja na utvrđivanje postojanja javnog interesa, što je predmet ove odluke, već će se takav zahtjev rješavati u postupku eksproprijacije. Zamolba da se iz prijedloga odluke izostavi objekat Doma rudara, također je neutemeljena, imajući u vidu da je eksproprijacija istog objekta dogovorena ranije zaključenim Protokolom o načinu rješavanja međusobnih odnosa između ZD RMU „Zenica“ d.o.o. Zenica i Grada Zenica, čije odredbe obavezuju njegove strane potpisnice i koje se ne mogu mijenjati davanjem usmenih izjava, a niti na takvo što upućuju razlozi izneseni od strane zakonskog zastupnika, jer objekat Doma rudara ne uživa status nacionalnog spomenika u BiH.

Stoga, a imajući u vidu da je na osnovu ovako ponovo provedenog postupka, u skladu sa Zakonom o upravnom postupku pravilno i potpuno utvrđeno činjenično stanje, iz kojeg proizlazi da je predlagач

ispunio sve uslove za utvrđivanje javnog interesa, propisane odredbama člana 14. stav (4) i člana 16. Zakona o eksproprijaciji Federacije BiH, odlučeno je kao u dispozitivu.

Broj: 01-15-12059/22

Zenica, 26.05.2022. godine

PREDSJEDAVAJUĆI
GRADSKOG VIJEĆA ZENICA
Mirza Husetić, s.r.

107.

Na osnovu člana 13. stav (2) alineja treća Zakona o principima lokalne samouprave u Federaciji Bosne i Hercegovine („Službene novine Federacije BiH“, broj: 49/06 i 51/09), člana 9. Zakona o poticaju razvoja male privrede („Službene novine Federacije BiH“, broj: 19/06), člana 21. tačka 5. Statuta Grada Zenica („Službene novine Grada Zenica“, broj: 5/15), člana 36. Poslovnika Gradskog vijeća („Službene novine Grada Zenica“, broj: 4/17, 4/20 i 10/21) i Budžeta Grada Zenica za 2022. godinu („Službene novine Grada Zenica“, broj: 2/22), Gradsko vijeće Zenica na 23. sjednici, održanoj dana 26.05.2022. godine, donijelo je

PROGRAM

mjera za utrošak podsticajnih sredstava namijenjenih za oblast privrede u 2022. godini

I OSNOVNE ODREDBE

Program mjera za utrošak podsticajnih sredstava namijenjenih za oblast privrede u 2022. godini na području Grada Zenica (u daljem tekstu: Program) je provedbeni akt Grada Zenica koji osigurava da se planirana sredstva Budžeta Grada Zenica za 2022. godinu koriste na transparentan, specifičan i mjerljiv način u vremenski određenom periodu s namjerom da se kroz podsticaj doprinese rastu i razvoju obrtničke i preduzetničke djelatnosti i omogući poboljšanje ukupnog životnog standarda na području Grada Zenica (u daljem tekstu: Grad).

Ovim Programom, uređuju se svrha i ciljevi Programa, korisnici i nosioci za provedbu Programom predviđenih aktivnosti, te uslovi za dodjelu sredstava.

Program će obezbijediti podsticaje za sufinansiranje projekata (poslovnih ideja) i zahtjeva obrtnika/preduzetnika koji su ranije registrovani na području Grada ili imaju namjeru da se registruju nakon objave ovog Programa, odnosno Javnog poziva.

Zahtjevi/aplikacije se podnose u skladu s procedurama predviđenim Programom, te Javnim pozivom i na propisanim obrascima.

Svrha ovoga Programa je stvaranje povoljnog poslovnog okruženja za djelovanje preduzetnika i obrtnika.

Ciljevi ovoga Programa su:

- povećanje broja novootvorenih firmi i obrta, posebno deficitarnih i inovativnih djelatnosti;
- kreiranje novih radnih mjesta;
- zapošljavanje nove radne snage;
- ekonomsko osnaživanje žena i promocija ženskog preduzetništva;
- unapređenje samozapošljavanja i zapošljavanja, te poboljšanje općih uslova za razvoj konkurentnosti obrta, mikro, malih i srednjih preduzeća na području Grada;
- razvoj preduzetništva mladih temeljenog na znanju i inovacijama.

II PERIOD REALIZACIJE PROGRAMA

Sredstva namijenjena za podsticaj unapređenja privrede kroz razvoj zapošljavanja i jačanje konkurentnosti privrede realizovat će se u periodu od dana donošenja ovog Programa do 31.12.2022. godine.

III IZVORI SREDSTAVA ZA PROVOĐENJE PROGRAMA

Potrebna sredstva za provođenje ovog Programa planirana su Budžetom Grada za 2022. godinu usvojenog na sjednici Gradskog vijeća održanoj 24.01.2022. godine („Službene novine Grada Zenica“, broj: 2/22), Služba za privredu, gradsku imovinu i upravljanje razvojem, ekonomski kod 614500-96 Transferi privatnim preduzećima (sufinansiranje projekata, finansiranje obrta i preduzetništva) u iznosu od 200.000,00 KM.

IV KORISNICI

Korisnici sredstava iz ovoga Programa mogu biti mikro, mali i srednji subjekti male privrede definisani članom 4. stav (1), tačka a), b) i c) Zakona o podsticanju razvoja male privrede („Službene novine Zeničko-dobojskog kantona“, broj: 7/2016), a koji su registrovani u skladu sa Zakonom o privrednim društvima („Službene novine Federacije BiH“, broj: 81/15) ili u skladu sa Zakonom o obrtu i srodnim djelatnostima („Službene novine Federacije BiH“, broj: 35/09 i 14/11) i to:

- koji su ili će biti registrovani kao matično preduzeće/obrt na području Grada Zenica;
- koji imaju karakter privatnog vlasništva;
- koji imaju ili će imati najmanje jednog zaposlenog;
- koji nemaju evidentiran dug prema Gradu Zenica po bilo kom osnovu;
- koji obavljaju proizvodnu, proizvodno-uslužnu i uslužnu djelatnost, kao pretežnu djelatnost;
- koji su u većinskom vlasništvu državljana BiH (minimalno 51%).

Korisnici ovog programa su i nezaposlene osobe koje se vode na evidenciji JU Služba za zapošljavanje Zeničko-dobojskog kantona - Biroa rada Zenica, a koje pokreću svoj biznis (start - up projekti) u Gradu.

Podnosilac zahtjeva za podsticaj može aplicirati samo na jednu od mjera Programa.

Pravo učešća na podsticaj po osnovu Programa **ne mogu ostvariti** :

- fizička lica registrovana ili imaju namjeru registrovati dopunsku djelatnost;
 - fizička lica koja su od Grada Zenica ostvarila podsticaj, registrovala pa odjavila djelatnost;
 - subjekti koji su u posljednja 24 mjeseca prije objave Javnog poziva obavljali istu ili sličnu djelatnost i istu su odjavili;
 - subjekti registrovani ili imaju namjeru registrovati bilo koju poljoprivrednu djelatnost (apliciraju na drugi program);
 - finansijske institucije;
 - subjekti registrovani ili imaju namjeru registrovati djelatnost igara na sreću i kasina;
 - subjekti koji obavljaju ili imaju namjeru registrovati djelatnost trgovine (trgovačke radnje, trgovac pojedinac i sl.);
 - subjekti koji obavljaju ili imaju namjeru registrovati ugostiteljsku djelatnost;
 - frizerski saloni i saloni za uljepšavanje;
 - advokati i notari;
 - javne i privatne ustanove;
 - subjekti koji obavljaju ili imaju namjeru registrovati zdravstvenu djelatnost;
 - javni prevoz stvari, putnika i autoškole.
-

V NOSILAC PROGRAMA

Nosilac provedbe ovoga Programa je Služba za privredu, gradsku imovinu i upravljanje razvojem, koja će jednom godišnje za prethodnu godinu sačiniti Informaciju o realizaciji Programa, te istu dostaviti Gradskom vijeću na razmatranje.

VI MJERE

Program podrazumijeva realizaciju sljedećih mjera:

Mjera	Naziv mjere	Planirani iznos u 2022.godini (u KM)
1	Podsticaj za "Moj prvi biznis u Gradu Zenica – START UP"	141.200,00
2	Podsticaj u okviru projekta „iSKOraK-Partnerstvo za nova radna mjesta“	58.800,00
UKUPNO:		200.000,00

VII OPIS MJERA

Mjera 1.	Podsticaj za "Moj prvi biznis u Gradu Zenica – START UP"
Cilj	- podsticajem je predviđeno sufinansiranje pokretanja malih biznisa, društva sa ograničenom odgovornošću, obrt-a i srodnih djelatnosti koji su pokrenuli registraciju nakon 01.06.2021. godine
Namjena	<ul style="list-style-type: none"> - subvencija doprinosa za zaposlenu/samozaposlenu osobu za najviše 12 mjeseci poslovanja - kupovina mašina, alata i opreme za obavljanje djelatnosti (polovna i nova oprema) - kupovina informatičke opreme za rad (osim laptopa) - kupovina licenciranih IT programa - troškovi registracije poslovnog subjekta (osim osnivačkog kapitala) - prednost odabira korisnika podsticaja imaju žene, mladi i nezaposlene osobe

Korisnici	<ul style="list-style-type: none"> - početnici koji prvi put registruju obrt ili društvo sa ograničenom odgovornošću nakon 01.06.2021. godine, sa matičnim sjedištem na području grada Zenice - aplikantima će biti osiguran trening iz oblasti preduzetništva koji se sastoji od 2 modula (generisanje poslovne ideje i započni svoj posao sa pisanjem poslovnog plana). Trening će izvršiti Zenička razvojna agencija ZEDA d.o.o.Zenica
Napomena	- maksimalan iznos podsticaja po aplikantu je 5.000,00 KM
Planiran iznos	141.200,00 KM
Mjera 2.	Podsticaj u okviru projekta „iSKOraK-Partnerstvo za nova radna mjesta“
Cilj	<ul style="list-style-type: none"> - korištenjem metodologije MOR (Međunarodna organizacija rada) i udruženih sredstva granta i grada Zenica stimulisan razvoj i registracija novih biznisa, posebno deficitarnih i inovativnih djelatnosti čime će se otvoriti nova radna mjesta i kreirati budući biznisi sa potencijalom zapošljavanja
Namjena	<ul style="list-style-type: none"> - u skladu sa prioritetima Projekta „Podrška Evropske unije lokalnim partnerstvima za zapošljavanje Faza II“ (LEP II) finansijska podrška se dodjeljuje u vidu granta, za osobe koje uspješno završe obuke „Osmisli svoju ideju“ i „Započni svoj posao“ i čiji poslovni planovi budu najbolje ocijenjeni od strane komisije koju će partneri formirati u toku projektne realizacije
Korisnici	<ul style="list-style-type: none"> - krajnji korisnici podsticaja su isključivo nezaposlene osobe koje su registrovane u evidencijama Službe za zapošljavanje ZDK uz ravnomjernu zastupljenost oba spola
Napomena	<ul style="list-style-type: none"> - iznos granta, prema kriterijima projekta, za novoosnovano mikro i malo preduzeće iznosi 9.800,00 KM
Planiran iznos	58.800,00 KM

VII REALIZACIJA PROGRAMA

Za provođenje **Mjere 1 „Podsticaj za “Moj prvi biznis u Gradu Zenica – START UP“** ovog Programa, Služba za privredu, gradsku imovinu i upravljanje razvojem će raspisati Javni poziv sa kriterijima.

Postupak po Javnom pozivu provest će Komisija koju će imenovati Gradonačelnik. Komisija će biti sačinjena od predstavnika Službe za privredu i upravljanje razvojem, Zeničke razvojne agencije ZEDA d.o.o. Zenica i Udruženja poslodavaca Zenica.

Komisija će, nakon provedenog Javnog poziva, izvršiti vrednovanje i rangiranje pristiglih prijava, te sačiniti zapisnik i Preliminarnu listu kandidata koji ispunjavaju propisane uslove i istu će javno objaviti na Oglasnoj ploči Grada Zenica i na web-stranici Grada Zenica, o čemu će izvijestiti Gradonačelnika Zenice.

Učesnici Javnog poziva, koji su nezadovoljni provođenjem postupka i rangiranjem na Preliminarnoj listi, mogu u roku od 8 dana od dana objavljivanja Preliminarne liste, uložiti prigovor Gradonačelniku Zenice.

Gradonačelnik Zenice, nakon razmatranja eventualnih prigovora i provedenog postupka po Javnom pozivu, obavještava podnosiocima prigovora i donosi Konačnu listu kandidata koji ispunjavaju propisane uslove javnog poziva.

Na osnovu Konačne liste, Grad Zenica će sa odabranim kandidatima potpisati ugovore u kojima će biti regulisana međusobna prava i obaveze.

Mjeru 2 „ Podsticaj u okviru projekta „iSKO-raK- Partnerstvo za nova radna mjesta“ ovog Programa, Služba za privredu, gradsku imovinu i upravljanje razvojem će realizovati u skladu sa pravilima Projekta „Podrška Evropske unije lokalnim partnerstvima za zapošljavanje Faza II“ (LEP II).

Služba za privredu, gradsku imovinu i upravljanje razvojem će u saradnji sa LPZ-om (Lokalno partnerstvo za zapošljavanje) definisati Javni poziv koji će obuhvatiti i edukaciju aplikanata po MOR metodologiji, uključujući i monitoring nakon dodijeljenih sredstava.

Javni poziv će biti usmjeren na podržavanje inovativnih biznisa kao i na biznise iz oblasti deficitarnih djelatnosti.

Edukaciju aplikanata izvršit će Zenička razvojna agencija ZEDA d.o.o. Zenica u saradnji sa certificiranim MOR predavačima.

Nakon što se provede edukacija, komisija za odabir najboljih poslovnih planova će odabrati najbolje poslovne ideje koje će biti podržane kroz projekat. Komisija će biti sastavljena od predstavnika LPZ-a. Kriteriji po osnovu kojih će biti odabrane najbolje ideje, će biti određeni u Javnom pozivu.

Ukoliko se planirana sredstva po mjerama iz objektivnih razloga u cijelosti ili djelimično ne iskoriste, ista se mogu preusmjeriti na drugu mjeru unutar Programa.

Kontrolu korištenja sredstava, koja se dodjeljuju na osnovu Programa, vršit će Služba za privredu, gradsku imovinu i upravljanje razvojem.

VIII STUPANJE NA SNAGU

Ovaj Program stupa na snagu danom donošenja i objavit će se u “Službenim novinama Grada Zenica”.

Broj: 01-45-11910/22
Zenica, 26.05.2022. godine

PREDSJEDAVALA
GRADSKOG VIJEĆA ZENICA
Mirza Husetić, s.r.

GRADONAČELNIK

108.

Na osnovu člana 59. Zakona o budžetima u FBiH (“Službene novine FBiH”, broj: 102/13, 9/14, 13/14, 8/15, 9/15, 102/15, 104/16, 5/18, 11/19 i 99/19), člana 34. Statuta Grada Zenica (“Službene novine Grada Zenica”, broj: 5/15), člana 28. Odluke o izvršavanju Budžeta Grada Zenica za 2022. godinu (“Službene novine Grada Zenica”, broj: 2/22) i Uputstva Grada Zenica o preraspodjeli odobrenih budžetskih sredstava, broj: 02-11-22295/20 od 09.11.2020. godine, Gradonačelnik Zenice donosi

ZAKLJUČAK

o preraspodjeli sredstava u Budžetu Grada Zenica za 2022. godinu

I

Odobrava se preraspodjela sredstava Budžeta Grada Zenica za 2022. godinu (“Službene novine Grada Zenica”, broj: 2/22), na organizacionom kodu 51010001 – Gradonačelnik.

II

Preraspodjela sredstava iz tačke I vrši se na sljedeći način:

Umanjuje se:

- ekonomski kod 613900, funkcija 0111, budžetska pozicija 6 - “Ugovorene i druge posebne usluge” za iznos od 5.750,00 KM.

Povećava se:

- ekonomski kod 614300, funkcija 0161, budžetska pozicija 14 - “Tekući transferi neprofitnim organizacijama” za iznos od 5.750,00 KM.

III

Za realizaciju ovog Zaključka zadužuju se Gradonačelnik i Služba za finansije.

IV

Ovaj Zaključak stupa na snagu danom donošenja, a objavit će se u "Službenim novinama Grada Zenica".

Broj: 02-45-9538/22

Zenica, 26.04.2022. godine

GRADONAČELNIK
Fuad Kasumović, s.r.

109.

Na osnovu člana 59. Zakona o budžetima u FBiH ("Službene novine FBiH", broj: 102/13, 9/14, 13/14, 8/15, 91/15, 102/15, 104/16, 5/18, 11/19 i 99/19), člana 34. Statuta Grada Zenica ("Službene novine Grada Zenica", broj: 5/15), člana 28. Odluke o izvršavanju Budžeta Grada Zenica za 2022. godinu ("Službene novine Grada Zenica", broj: 2/22) i Uputstva Grada Zenica o preraspodjeli odobrenih budžetskih sredstava, broj: 02-11-22295/20 od 09.11.2020. godine, na prijedlog Službe za vodoprivredu, putnu infrastrukturu i mjesne zajednice, Gradonačelnik Zenice donosi

ZAKLJUČAK**o preraspodjeli sredstava u Budžetu Grada Zenica za 2022. godinu****I**

Odobrava se preraspodjela sredstava Budžeta Grada Zenica za 2022. godinu ("Službene novine Grada Zenica", broj: 2/22), na organizacionom kodu 61010001 – Služba za vodoprivredu, putnu infrastrukturu i mjesne zajednice.

II

Preraspodjela sredstava iz tačke I vrši se na sljedeći način:

Umanjuje se:

- ekonomski kod 614300, funkcija 0491, fond 01, budžetska pozicija 254 - "Sufinansiranje u projektima jačanja lokalne samouprave i uloge MZ", za iznos od 120.000,00 KM i
- ekonomski kod 821200, funkcija 0621,

fond 01, budžetska pozicija 260 - "Izgradnja mosta preko rijeke Bosne u Blatuši", za iznos od 25.500,00 KM.

Formiraju se nove budžetske pozicije:

- ekonomski kod 613700, funkcija 0463, fond 01, budžetska pozicija 244A - "Izdaci za tekuće održavanje putne mreže -sufinansiranje u projektima jačanja lokalne samouprave i uloge MZ", u iznosu od 120.000,00 KM i
- ekonomski kod 821600, funkcija 0623, fond 01, budžetska pozicija 270A - "Rekonstrukcija i investiciono održavanje društvenih domova - sufinansiranje u projektima jačanja lokalne samouprave i uloge MZ", u iznosu od 25.500,00 KM.

III

Za realizaciju ovog Zaključka zadužuju se Služba za vodoprivredu, putnu infrastrukturu i mjesne zajednice i Služba za finansije.

IV

Ovaj Zaključak stupa na snagu danom donošenja, a objavit će se u "Službenim novinama Grada Zenica".

Broj: 02-11-10281/22

Zenica, 13.05.2022. godine

GRADONAČELNIK
Fuad Kasumović, s.r.

110.

Na osnovu člana 59. Zakona o budžetima u FBiH ("Službene novine FBiH", broj: 102/13, 9/14, 13/14, 8/15, 91/15, 102/15, 104/16, 5/18, 11/19 i 99/19), člana 34. Statuta Grada Zenica ("Službene novine Grada Zenica", broj: 5/15), člana 28. Odluke o izvršavanju Budžeta Grada Zenica za 2022. godinu ("Službene novine Grada Zenica", broj: 2/22) i Uputstva Grada Zenica o preraspodjeli odobrenih budžetskih sredstava, broj: 02-11-22295/20 od 09.11.2020. godine, na prijedlog Službe za vodoprivredu, putnu infrastrukturu i mjesne zajednice, Gradonačelnik Zenice donosi

ZAKLJUČAK**o preraspodjeli sredstava između budžetskih korisnika u Budžetu Grada Zenica za 2022. godinu****I**

Odobrava se preraspodjela sredstava između budžetskih korisnika u okviru odobrenog Budžeta Grada Zenica za 2022. godinu ("Službene novine Grada Zenica", broj: 2/22), sa organizacionog koda 51010001 – Gradonačelnik, na organizacioni kod 61010001 - Služba za vodoprivredu, putnu infrastrukturu i mjesne zajednice.

II

Preraspodjela sredstava iz tačke I vrši se na sljedeći način:

Umanjuju se sredstva na:

- organizacionom kodu 51010001 - Gradonačelnik, ekonomski kod 613900, funkcija 0861, budžetska pozicija 11 - "Izrada projektne dokumentacije zatvorenog bazena" za iznos od 200.000,00 KM.

Povećavaju se sredstva na:

- organizacionom kodu 61010001 - Služba za vodoprivredu, putnu infrastrukturu i mjesne zajednice, ekonomski kod 613700, funkcija 0461, budžetska pozicija 244 - "Izdaci za tekuće održavanje putne mreže" za iznos od 200.000,00 KM.

III

Za realizaciju ovog Zaključka zadužuju se Služba za vodoprivredu, putnu infrastrukturu i mjesne zajednice i Služba za finansije.

IV

Ovaj Zaključak stupa na snagu danom donošenja, a objavit će se u "Službenim novinama Grada Zenica".

Broj: 02-11-10386/22

Zenica, 13.05.2022. godine

GRADONAČELNIK

Fuad Kasumović, s.r.

111.

Na osnovu člana 59. Zakona o budžetima u FBiH ("Službene novine FBiH", broj: 102/13, 9/14, 13/14, 8/15, 91/15, 102/15, 104/16, 5/18, 11/19 i 99/19), člana 34. Statuta Grada Zenica ("Službene novine Grada Zenica", broj: 5/15), člana 28. Odluke o izvršavanju Budžeta Grada Zenica za 2022. godinu ("Službene novine Grada Zenica", broj: 2/22) i Uputstva Grada Zenica o preraspodjeli odobrenih budžetskih sredstava, broj: 02-11-22295/20 od 09.11.2020. godine, na prijedlog Službe za socijalnu zaštitu, stambene poslove i društvene djelatnosti, Gradonačelnik Zenice donosi

ZAKLJUČAK**o preraspodjeli sredstava u Budžetu Grada Zenica za 2022. godinu****I**

Odobrava se preraspodjela sredstava Budžeta Grada Zenica za 2022. godinu ("Službene novine Grada Zenica", broj: 2/22), na organizacionom kodu 59010001 - Služba za socijalnu zaštitu, stambene poslove i društvene djelatnosti.

II

Preraspodjela sredstava iz tačke I vrši se na sljedeći način:

Umanjuje se:

- ekonomski kod 613300, funkcija 0622, budžetska pozicija 116 - "Održavanje dječijih i sportskih igrališta" za iznos od 20.000,00 KM i
- ekonomski kod 615400, funkcija 0811, fond 01, budžetska pozicija 153A - "Kapitalni transfer JP za upravljanje i održavanje sportskih objekata d.o.o. Zenica za rekonstrukciju i opremanje otvorenih bazena" za iznos od 130.000,00 KM.

Povećava se:

- ekonomski kod 613500, funkcija 1091, budžetska pozicija 118 - "Troškovi prijevoza đaka i ostalih socijalno ugroženih lica" za iznos od 80.000,00 KM.

Formira se nova budžetska pozicija:

- ekonomski kod 614300, funkcija 1093, budžetska pozicija 143A - "Transfer Udruženju penzionera za pomoć socijalno ugroženim penzionerima" u iznosu od 70.000,00 KM.

III

Za realizaciju ovog Zaključka zadužuju se Služba za socijalnu zaštitu, stambene poslove i društvene djelatnosti i Služba za finansije.

IV

Ovaj Zaključak stupa na snagu danom donošenja, a objavit će se u "Službenim novinama Grada Zenica".

Broj: 02-45-10763/22

Zenica, 17.05.2022. godine

GRADONAČELNIK

Fuad Kasumović, s.r.

112.

Na osnovu člana 59. Zakona o budžetima u FBiH ("Službene novine FBiH", broj: 102/13, 9/14, 13/14, 8/15, 91/15, 102/15, 104/16, 5/18, 11/19 i 99/19), člana 34. Statuta Grada Zenica ("Službene novine Grada Zenica", broj: 5/15), člana 28. Odluke o izvršavanju Budžeta Grada Zenica za 2022. godinu ("Službene novine Grada Zenica", broj: 2/22) i Uputstva Grada Zenica o preraspodjeli odobrenih budžetskih sredstava, broj:02-11-22295/20 od 09.11.2020. godine, na prijedlog Službe za privredu, gradsku imovinu i upravljanje razvojem, Gradonačelnik Zenice donosi

ZAKLJUČAK**o preraspodjeli sredstava u Budžetu Grada Zenica za 2022. godinu****I**

Odobrava se preraspodjela sredstava Budžeta Grada Zenica za 2022. godinu ("Službene novine Grada Zenica", broj: 2/22) na organizacionom kodu 58010001 - Služba za privredu, gradsku imovinu i upravljanje razvojem.

II

Preraspodjela sredstava iz tačke I vrši se na sljedeći način:

Umanjuje se:

- ekonomski kod 613900, funkcija 0493, budžetska pozicija 90 - "Učešće u finansiranju projekata (Strategija razvoja, IPA, CBC, MED i dr.)" za iznos od 5.500,00 KM.

Povećava se:

- ekonomski kod 613400, funkcija 0133, budžetska pozicija 83 - "Nabavka materijala i sitnog inventara – prehrambeni i ostali materijal za skladište" za iznos od 5.500,00 KM.

III

Za realizaciju ovog Zaključka zadužuju se Služba za privredu, gradsku imovinu i upravljanje razvojem i Služba za finansije.

IV

Ovaj Zaključak stupa na snagu danom donošenja, a objavit će se u "Službenim novinama Grada Zenica".

Broj: 02-45-11071/22

Zenica, 25.05.2022. godine

GRADONAČELNIK

Fuad Kasumović, s.r.

113.

Na osnovu člana 12. Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", broj: 12/03, 34/03 i 65/13), a u vezi sa članom 34. tačka 5. i 6. i članom 117. Statuta Grada Zenica ("Službene novine Grada Zenica", broj: 5/15), Gradonačelnik Grada Zenica, d o n o s i

RJEŠENJE**o imenovanju člana Upravnog odbora Javne ustanove "Dom za stara lica Zenica" Zenica****I**

Za člana Upravnog odbora Javne ustanove "Dom za stara lica Zenica" Zenica, imenuje se:

1. Tajib Babić, diplomirani psiholog.

II

Mandat člana Upravnog odbora iz tačke I ovog Rješenja traje do 06.01.2026. godine, odnosno do isteka mandata predsjednika i člana Upravnog odbora Javne ustanove "Dom za stara lica Zenica" Zenica čiji su mandati u toku.

III

Ovo Rješenje stupa na snagu danom donošenja i objavit će se u "Službenim novinama Grada Zenica".

Broj: 02-45-10935/22

Zenica, 18.05.2022. godine

GRADONAČELNIK
Fuad Kasumović, s.r.

114.

Na osnovu člana 12. Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", broj: 12/03, 34/03 i 65/13), a u vezi sa članom 34. tačka 5. i 6. i članom 117. Statuta Grada Zenica ("Službene novine Grada Zenica", broj: 5/15), Gradonačelnik Grada Zenica, d o n o s i

R J E Š E N J E**o imenovanju predsjednika Upravnog odbora Javne ustanove Gradska biblioteka Zenica****I**

Za predsjednika Upravnog odbora Javne ustanove Gradska biblioteka Zenica, imenuje se:

1. Fikret Brdarević, doktor ekonomskih nauka.

II

Mandat predsjednika Upravnog odbora iz tačke I ovog Rješenja traje do 06.06.2025. godine, odnosno do isteka mandata članova Upravnog odbora Javne ustanove Gradska biblioteka Zenica čiji su mandati u toku.

III

Ovo Rješenje stupa na snagu danom donošenja i objavit će se u "Službenim novinama Grada Zenica".

Broj: 02-45-12018/22

Zenica, 01.06.2022. godine

GRADONAČELNIK
Fuad Kasumović, s.r.

**GRADSKA BIBLIOTEKA ZENICA
UPRAVNI ODBOR****115.**

Na osnovu člana 12. Zakona o ministarskim, vladinim i drugim imenovanjima Federacije Bosne i Hercegovine ("Službeni list FBiH", br.: 12/03, 34/03 i 65/13), člana 29. Uredbe sa zakonskom snagom o ustanovama ("Službeni list RBiH", broj: 6/92, 8/93 i 13/94), članova 38. i 43. Pravila Gradske biblioteke Zenica (br.: 27/18, 187/18 i 247/21), a po dobijenoj prethodnoj saglasnosti Gradonačelnika Grada Zenica broj: 02-45-9669/22 od 28.04.2022. godine, Upravni odbor Gradske biblioteke Zenica na 85. sjednici održanoj dana 12.05.2022. godine, d o n o s i

ODLUKU**o imenovanju direktora Gradske biblioteke Zenica****Član 1.**

Nermin Ormanović, magistar komparativne književnosti i bibliotekarstva imenuje se za **direktora** Gradske biblioteke Zenica.

Član 2.

Imenovanje se vrši na mandatni period od četiri (4) godine.

Dužnost direktora imenovani će obavljati počev od dana 21.05.2022. godine pa do isteka mandatnog perioda, odnosno do njegovog razrješenja.

Član 3.

Sa imenovanim direktorom će se zaključiti Ugovor o radu na određeno vrijeme u kojem će se detaljnije regulisati sva prava i obaveze.

Član 4.

Ova Odluka stupa na snagu danom donošenja i bit će objavljena u "Službenim novinama Grada Zenica".

Broj: 222/22

Datum: 12.05.2022. godine

PRIVREMENI PREDSJEDNIK UO

Dr.sc. Fikret Brdarević, dipl.ecc

MINISTARSTVO ZDRAVSTVA ZENIČKO-DOBOJSKOG KANTONA

116.

Na osnovu člana 200. Zakona o upravnom postupku („Službene novine FBiH“, broj 2/98 i 48/99), člana 2. stav 1. Pravilnika o načinu pregleda umrlih, te utvrđivanja vremena i uzroka smrti („Sl. novine FBiH“, broj: 79/13 i 9/14) i člana 3. Odluke o utvrđivanju organizacije i rada mrtvozorničke službe kojom se osigurava pregled, utvrđivanje vremena i uzroka smrti osoba umrlih izvan zdravstvene ustanove na području Zeničko-dobojskog kantona („Sl. novine Zeničko-dobojskog kantona“, broj: 8/18 i 4/19), na zahtjev JU “Dom zdravlja” Zenica, Ministarstvo zdravstva Zeničko-dobojskog kantona d o n o s i

R J E Š E N J E

o dopuni rješenja o imenovanju mrtvozornika

I

Dopunjava se tačka I dispozitiva rješenja Ministarstva zdravstva broj: 11-37-18294-1/18 od 25.03.2019. godine i dodaje se redni broj 6. koji glasi: „dr Sabina Mekić, spec. urgentne medicine“, redni broj 7. koji glasi: „dr Admir Isaković“ i redni broj 8. koji glasi: „dr Ahmed Awad“.

II

Mandat imenovanih mrtvozornika iz tačke I ovog rješenja traje do isteka mandata mrtvozornika imenovanih rješenjem Ministarstva zdravstva broj: 11-37-18294-1/18 od 25.03.2019. godine.

III

Ovo rješenje čini sastavni dio rješenja Ministarstva zdravstva broj: 11-37-18294-1/18 od 25.03.2019. godine

IV

Ovo rješenje će se objaviti u „Službenim novinama Grada Zenica“.

O b r a z l o ž e n j e

JU “Dom zdravlja” Zenica prijedlogom za imenovanje mrtvozornika od 29.04.2022. godine predložila je imenovanje tri mrtvozornika i to dr Sabinu Mekić, dr Ahmeda Awad i dr Admir Isaković. Podneskom JU “Dom zdravlja” Zenica broj: OU-01.1-99-39262/22 od 11.05.2022. godine izvršena je dopuna dokumentacije i navedeno je da su razlozi za predloženo imenovanje mrtvozornika manjak stručnog kadra i izostanak sa posla zbog godišnjih odmora i bolovanja što otežava organizaciju rada u Službi hitne medicinske pomoći.

Uz prijedlog i izvršenu dopunu dokumentacije od 11.05.2022. godine priložena je sljedeća dokumentacije: diploma broj: 8264/2012 od 09.11.2013. godine, izdata od Medicinskog fakulteta u Sarajevu, uvjerenje o položenom stručnom ispitu broj: 11/01-

153-1034/12 od 03.01.2013. godine, izdato od Ministarstva zdravlja i socijalne zaštite Republike Srpske, licenca za samostalan rad broj: F04R10356 od 07.03.2019. godine, izdata od Ljekarske komore Zeničko-dobojskog kantona, uvjerenje o državljanstvu broj: 10-10-1-19450/2022 od 28.04.2022. godine, izdato od Grad Zenica, uvjerenje o uspješno završenoj edukaciji iz mrtvozorništva broj: 130 od 06.04.2022. godine, izdato od Instituta za zdravlje i sigurnost hrane Zenica, svi dokumenti izdati na ime Mekić Sabina, diploma broj: 7/2908 od 20.07.2020. godine, izdata od Medicinskog fakulteta Univerziteta u Tuzli, uvjerenje o položenom stručnom ispitu broj: 11/01-153-380/20 od 02.03.2020. godine, izdato od Ministarstva zdravlja i socijalne zaštite Republike Srpske, uvjerenje o državljanstvu broj: 10-10-1-2-21030/2022, od 11.05.2022. godine, izdato od Grad Zenica, licenca za samostalan rad broj: F04A1197 od 10.06.2020. godine, izdata od Ljekarske komore Zeničko-dobojskog kantona, uvjerenje o uspješno završenoj edukaciji iz mrtvozorništva broj: 133 od 06.04.2022. godine, izdato od Instituta za zdravlje i sigurnost hrane Zenica, svi dokumenti izdati na ime Admir Isaković, uvjerenje o uspješno završenoj edukaciji iz mrtvozorništva broj: 132 od 06.04.2022. godine, izdato od Instituta za zdravlje i sigurnost hrane Zenica na ime Ahmed Awad i zahtjev za imenovanje ovlaštenih ljekara mrtvozornika za područje Općine Zenica broj: 04-1.1-25-39263/22 od 11.05.2022. godine, izdat od JU „Dom zdravlja“ Zenica.

U provedenom postupku izvršen je uvid u spis Ministarstva zdravstva broj: 11-37-18294 pod kojim se vodi konkretna upravna stvar i utvrđeno je da se u spisu nalazi sljedeća dokumentacija pravno relevantna za rješavanje ove upravne stvari i to: rješenje o imenovanju mrtvozornika Ministarstva zdravstva broj: 11-37-18294-1/18 od 25.03.2019. godine, diploma broj: 7/2501 od 11.10.2016. godine, izdata od Medicinskog fakulteta Univerziteta u Tuzli, uvjerenje o položenom stručnom ispitu broj: 11/01-153-1537/16 od 26.09.2016. godine, izdato od Ministarstva zdravlja i socijalne zaštite Republike Srpske, licenca za samostalan rad broj: F04R11011 od 28.09.2017. godine, izdata od Ljekarske komore Zeničko-dobojskog kantona i uvjerenje o državljanstvu broj: 10-10-1-2422/2022 od 17.01.2022. godine, izdato od Grad Zenica, svi dokumenti izdati na ime Ahmed Awad.

Uvidom u rješenje o imenovanju mrtvozornika Ministarstva zdravstva broj: 11-37-18294-1/18 od 25.03.2019. godine, utvrđeno je da su navedeni imenovani mrtvozornici za obavljanje pregleda umrlih i utvrđivanje uzroka smrti osoba umrlih izvan zdravstvene ustanove na području Grada Zenica.

Uvidom u priloženu dokumentaciju JU „Dom zdravlja“ Zenica i dokumentaciju iz spisa Ministarstva zdravstva, na nesporan način je utvrđeno da dr Sabina Mekić, spec. urgentne medicine, dr Admir Isaković i dr Ahmed Awad ispunjavaju opće uvjete za imenovanje mrtvozornika, koji su propisani članom 4. stav 2. Odluke o utvrđivanju organizacije i rada mrtvozorničke službe kojom se osigurava pregled, utvrđivanje vremena i uzroka smrti osoba umrlih izvan zdravstvene ustanove na području Zeničko-dobojskog kantona (u daljem tekstu: Odluka).

Dalje je na nesporan način utvrđeno da su dr Sabina Mekić, spec. urgentne medicine, dr Admir Isaković i dr Ahmed Awad završili edukaciju iz mrtvozorništva čime je ispunjen poseban uvjet za imenovanje koji je propisan članom 4. stav 3. Odluke.

Imajući u vidu navedeno u skladu sa članom 3. stav 1. i 2. Odluke, a u vezi sa članom 4. stav 2. i 3. Odluke, odlučeno je kao u dispozitivu ovog rješenja.

Pouka o pravnom lijeku:

Protiv ovog rješenja može se izjaviti žalba Federalnom ministarstvu zdravstva u roku od 15 dana od dana prijema rješenja. Žalba se podnosi u dva primjerka, putem Ministarstva zdravstva Zeničko-dobojskog kantona, usmeno na zapisnik ili pismeno.

Broj: 11-37-18294-4/18

Datum: 18.05.2021. godine

MINISTAR

Dr. Adnan Jupić

SADRŽAJ

GRADSKO VIJEĆE

106. Odluka o utvrđivanju javnog interesa 1
107. Program mjera za utrošak podsticajnih sredstava namijenjenih za oblast privrede u 2022. godini 4

GRADONAČELNIK

108. Zaključak o preraspodjeli sredstava u Budžetu Grada Zenica za 2022. godinu 8
109. Zaključak o preraspodjeli sredstava u Budžetu Grada Zenica za 2022. godinu 9
110. Zaključak o preraspodjeli sredstava između budžetskih korisnika u Budžetu Grada Zenica za 2022. godinu 10
111. Zaključak o preraspodjeli sredstava u Budžetu Grada Zenica za 2022. godinu 10
112. Zaključak o preraspodjeli sredstava u Budžetu Grada Zenica za 2022. godinu 11
113. Rješenje o imenovanju člana upravnog odbora javne ustanove "Dom za stara lica Zenica" Zenica 11
114. Rješenje o imenovanju predsjednika Upravnog odbora Javne ustanove Gradska biblioteka Zenica 12

GRADSKA BIBLIOTEKA ZENICA UPRAVNI ODBOR

115. Odluka o imenovanju direktora Gradske biblioteke Zenica 12

MINISTARSTVO ZDRAVSTVA ZENIČKO-DOBOJSKOG KANTONA

116. Rješenje o dopuni Rješenja o imenovanju mrtvozornika 13